

Անցան տարիներ. Աւետարանի սկզբունքները եկեղեցուց ու դպրոցից սկսած՝ անյայտ մնացին, ծածկուեցին ժողովրդի աչքից, նա մի միայն անհասկանալի ծէս լսեց հոգևորականի բերանից, մի միայն ծխապաշտութեան և ծխական քրիստոնէութեան շնորհիւ թուլացաւ հաւատը մարդկանց մէջ և բնաւորութեան ոյժը՝ մանաւանդ ողջախոհութեան մէջ՝ տեղի տուաւ լսուեց կրքի քարոզը, մարմնի պարարտացման և փոփկացման հոգսը առաջին տեղը բռնեց, դրան միացան հազար օւմի գրգռիչ պատճառներ և միջոցներ, թուլացաւ օրէնքի և խղճի հսկողութիւնը, առաջ եկան տնտեսական նորանոր պահանջներ և խնդիրներ և ահա մենք այդ բոլորի շնորհիւ ականատես Վիպ ենք մեր նահապետական սուրբ ամբոցի՝ ընտանեկան միութեան քայքայման, առանց քննել և չափել կարողանալու նրա հետեւանքներ:

Ի՞նչ հայացքներ կան մեր ժամանակում եկեղեցական ամուսնութեան, ընտանեկան կապի անխզելիութեան և ընտանիքի անդամների բարոյականութեան մասին. ինչ ճանապարհով մարդիկ յոյս ունեն իրականացնելու մաքուր և ուժեղ ընտանիքի բարոյականն ու գաղափարը, իսկապէս որոնք պէտք է համարուեն և են իսկական բուժիչ միջոցները, կաշխատենք յառաջ բերել հետեւեալ անգամ:

Ե. Տ. Վ. Մ.

ՄԱՅՐ ԱԹՈՌ

Այս տարի սովորական հանգիստւորութեամբ կատարուեցին սրբոց կուսանանց տօները Հռիփսիմէի, Գայանէի և Շողակաթի վանքերում: Ազգիս Վեհափառ Հայրապետը կարողացաւ ներկայ գտնուիլ կուսանանց տօնին Ս. Հռիփսիմէի վանքում, որը շատ վայելուչ նորոգուած է թէ դրսից և թէ ներսից: Յանկալի է, որ բարեգործ

անձինք նայնպիսի գրութեան վերածեն նաև Գայանէի և Շողակաթի վանքերը. որոնց վերանորոգութիւնն իսկապէս մեծագումար ծախք չի պահանջում:

Վեհափառ Հայրապետի հրամանաւ Ս. Էջմիածին հասաւ Մայիսի սկզբներին Սանահնի վանքի վանահայր Գարեգին եպիսկոպոս Սաթուհեանը:

Էջմիածին վերադարձան Եղիշէ ծ. վարդապետ Մուրադեանն ու Կորիւն վարդապետը, որոնք Վ. Հայրապետի հրամանով գնացել էին Թէլէթ:

Մայր Աթոռ հասաւ Կարսուց վիճակի փոխանորդ Տ. Կիւրեղ վարդապետ Կիւրեղեանը իւր վիճակի վերաբերեալ այլևայլ խնդիրների լուծումն խնդրելու համար:

Մայր Աթոռ վերադարձաւ և մեկնեց իւր պաշտօնատեղին՝ Նախիջևան տ. Իսահակ վարդապետը:

Բաքու վերադարձաւ տեղական հայ եկեղեցեաց գործակալ տ. Մատթէոս վարդապետը, որը Վեհի հրամանով եկել էր Ս. Էջմիածին:

Վեհափառի հրամանով արտասահման ուղարկուեց ուսանելու Մայր Աթոռիս միաբան Ներսէս վարդապետ Թովմաղեանը՝ հանգուցեալ Բարեգործ Ղուկասեանի հաշուով:

Վեհափառ Հայրապետն ի նկատի առնելով հետզհետէ հասող բողոքները Սալմաստի փոխանորդ Մատթէոս վարդապետի արարքների մասին, մայիսի 27 ին հեռագրաւ արձակեց նրան փոխանորդութեան պաշտօնից և հրամայեց վերադառնալ Տաճկաստան՝ իւր ծննդավայրը: